

Operation verwundern muß. Mit gemein Wasser vermischet / vnd in den Mund gehalten / stillt das Zahnweh (so scharpffe Fluß darein gefallen.) Ein wenig mit einem Elisir geben / tödtet die Würm im Leib / vnd stillt Colicam.

Weiters kan auch dieser Spiritus zu vielen andern Sachen gebraucht werden / insonderheit kan man damit viel herrliche vnd kräftige Medicamenten auß den Metallen vnd Mineralien zurichten / davon etliche sollen beschrieben werden / wie folget.

NB. Es ist noch eine andere Materi / welche allenthalben gefunden wirdt / vnd zu allen Zeiten / von jederman ohne Distillation vnd Kosten kan erlangt werden / vnd eben so gut ist in oberzehlten Kranckheiten / als der distillirte Spiritus, vnd wann alle Menschen solches wüßten / würden nicht allenthalben so viel Krancke / Apotecker vnd Doctores gefunden werden / welche den Krancken zu Liebe hieher gesetzt ist.

Was dieses für ein Materi sey / darnach so viel zeithero ich solcher gedacht / ist getrachtet worden / will ich vmb der Krancken willen / welchen sie viel dienen kan / nicht länger verhalten. Wann man die jetzige Welt wol anseheth vnd betrachtet / so findet man nichts anders / als ein pur lauter verkehrt / vnd verdorben Wesen / vnd vom Teuffel durch Hoffart / eigen. Ruh / Ehrgeiz / vnd andern Lastern eingenommene böse Menschen / welche zu allem guten thun blind vnd lahm / zum bößthun aber scharpffsichtig